

МЕСЯЦА ИЮНИА В 23-Й ДЕНЬ.

СРЕТЕНИЕ ЧУДОТВОРНОЙ ИКОНЫ ПРЕСВЯТЫЯ БОГОРОДИЦЫ, ЯЖЕ НАРИЦАЕТСЯ ВЛАДИМИРСКАЯ ВЕЧЕР

Блажен муж: На Господи, воззвах: стихиры на 8, глас 4.

Подобен: Яко добля:

Яко светоносная палата * и одр всезлатый, Богородице Владычице: * Ты бо Слово Божие * во Твоих ложеснах вместила еси, * и, рождши нам Солнце незаходимое, * Свет невечерний, * наша прежде неразумием омраченная сердца * благоразумием осветила еси, * и льсти тьму разорила еси.

Твоим Рождеством адова крепость разорися, * и все человечество спасено бысть, * ныне же Твоими молитвами * врагов наших шатание низложи, * и крепость их сокруши, * и людем Твоим победы на враги даруй, * да посрамятся вси, * являющии рабом Твоим злая.

Богородице Владычице, * державная Помощнице, * укрепи славящую Тя страну на враги, * да якоже древле спасла еси Царский град от нахождения поганых, * тако и ныне спаси страну Российскую от нахождения вражия, * от междоусобных рати, * от глада же и труса, * Дево Неискусобрачная. * Сего ради Тя славит страна Российская, * человеком Помощницу.

Ныне страна Российская * о Тебе хвалится и веселится, * имеющи Тя Заступницу непостыдную * и стену нерушиму, * граду нашему непоколебимое основание, * стража неусыпна земли Российския. * Не престай ныне Твоими, Госпоже, молитвами * избавляти Твой град и люди от всех бед.

Тебе припадают, Госпоже, * святителей сословие и собори, * совокупление всех, монаси и протии * и весь народ, умильно молящися, * Тебе ныне кланяющися, * и любезно целующе Твой образ, * и, молящися, глаголют: * чтущий Тя град всегда спасай от всех бед.

Ины стихиры, глас 8.

Подобен: О, преславнаго чудесе:

О, преславнаго чудесе! * Иже невместимый небесы, * и Ангелы славимый, * и от Серафимов поемый, * на землю сошед, в Твою утробу вместися * и ключа девства не разруши, * наше естество, древле от диавола мучимо, изыят * и весь род человеческий свободи, * Тебе же, Госпоже, Заступницу нам дарова. * Тем не престай сохраняти * и спасати души наша, яко Милосерда.

О, преславнаго чудесе! * Се заступление прииде, * супротивление низложися, * град наш спаси, * враги наша прожени * и нас, рабов Твоих, Твоею милостию возвесели, * О Божия Слова селение! * Род человеческий, чтущий Тя, * всегда спасай от всех бед.

Подаждь утешение Твоим рабом, Чистая, * напастьми одержимым, * и рог верных вознеси, * Богородительнице Марие, * спаси молитвами Твоими град Твой неразрушим, * и варварская шатания низложи, * и нас, рабов Твоих, Безвестная, * хвалящих Тя, спаси.

Слава, и ныне, глас 8:

Приидите, россиястии собори, * приидите, верных совокупления, * в сретение Царицы Богоотроковицы: * се бо грядет Царица Своим образом честным, * спасти град и люди, от сопостатных поган невоеваны. * О, чудо велие и преславное * и пребольши ума! * Како пришествием честнаго Ея образа сопотивнии побеждаются * и отечество наше утверждается? * Нощь упразднися, и день приближися. * Егоже ради Тебе, вину спасения нашего, естество наше приемлет * и вся тварь воспеваает, Ти зовущи: * радуйся, Предстательнице, и Помощнице, * и спасение душ наших.

Вход, прокимен дне. Чтения три.

Бытия чтения (глава 28):

Изыде Иаков от студенца клятвеннаго и иде в Харрань. И обрете место, и спа тамо, зайде бо солнце; и взят от камня места того, и положи возглавие себе, и спа на месте оном, и сон виде. И се лествица, утверждена на земли, еяже глава досязаше до небес, и Ангели Божии восхождаху и низхождаху по ней. Господь же утверждашеся на ней и рече: Аз Бог Авраамов, отца твоего, и Бог Исааков, не бойся. Земля, идеже ты спиши на ней, тебе дам ю и семени твоему. И будет семя твое, яко песок земный, и распространится на море, и Ливу, и север, и на востоки, и возблагословятся о тебе вся колена земная и о семени твоём. И се Аз с тобою, сохраняяй тя на всяком пути, аможе аще пойдеш. И возвращу тя в землю сию, яко не имам тебе оставити, дондеже сотворити Ми вся, елика глаголах тебе. И воста Иаков от сна своего и рече: яко есть Господь на месте сем, аз же не ведех. И убояся, и рече: яко страшно место сие, несть сие, но дом Божий, и сия врата Небесная.

Пророчества Иезекиилева чтение (главы 43 и 44):

Тако глаголет Господь: будет от дне осмаго и прочее, сотворят иереи на олтари всесожжения вашего и яже спасения вашего, и прииму вы, глаголет Адонаи Господь. И обрати мя на путь врат святых внешних, зрящих на востоки, и сия бяху затворена. И рече Господь ко мне: врата сия затворена будут и не отверзутся, и никтоже пройдет сквозе их, яко Господь, Бог Израилев, пройдет ими, и будут затворена. Яко игумен сядет в них снести хлеб, по пути еламских врат внидет и по пути его изыдет. И введе мя по пути врат святых, сущих к северу, прямо храму, и видех, и се исполнь славы храм Господень.

Притчей чтение (глава 9):

Премудрость созда себе дом и утверди столпов седмь. Закла своя жертвенная, и раствори в чаше своей вино, и уготова свою трапезу. Посла своя рабы, созывающии с высоким проповеданием на чашу, глаголющи: иже есть безумен, да уклонится ко мне. И требующим ума рече: приидите, ядите мой хлеб и пейте вино, еже растворих вам. Оставьте безумие, и живи будете. И взыщите разума, да поживете и исправите разум в ведении. Наказуяй злыя примет себе безчестие, обличаяй же нечестиваго опорочит себе, обличение бо нечестивому – раны ему. Не обличай злых, да не возненавидят тебе, обличай премудра, и возлюбит тя. Дажь премудрому вину, и премудрший будет. Сказуй праведному, и приложит приимати. Начало премудрости – страх Господень, и совет святых – разум. Разумети бо закон помысла есть благаго: сим бо образом многое поживеши время, и приложатся тебе лета живота.

На литии стихиры, глас 2. Самогласны:

Яко воистинну древняго кивота пречестнее, * егда Давид, собрав чины, ликовствоваше, * ныне Твоя, Богородице, икона, * ейже предстоят архиереев собори, * и с чинми Ангел, * и все христоименитых людей множество * достойно блажат Тя, Матерь Божию, * и прославляют раболепно, и чувствуют, и покланяются, * и молятся Тебе по Бозе: * да мир умириши в православии, * и отечество утвердиши, * и спасеши от всех зол Твоя рабы, * яко едина Благословенная.

Предстоят Ти, Госпоже Богородице, * пред Твоим, Пречистая, образом, * архиереев сословие и вси людие, * монаси и прости, * ведуще Тя воистинну Помощницу сильну и непобедиму, * моления Тебе приносят от всея души подвизаются * и поуцают на молитву к Богу, * требующе Твоя помощи, * да простреси богоносныя Твоя руки * и умолиши за мир. * Вонми и услыши, Владычице, * и подаждь утешение рабом Твоим, * дондеже не одолеют ны грехи наша тяжкия и лютыя: * Твоя бо всегда требуем вси помощи.

Глас 8: **П**ервее написавшейся Твоей иконе * евангельских таин благовестником * и к Тебе, Царице, принесенней, * да усвоиши Ту * и сильну соделаеши спасти чествующия Тя. * И порадовалася еси, яко сущи Милостива, * спасения нашего Содетельница, * яко уста и глас иконе бывше, * якоже и Бога внегда зачинающи во чреве, * песнь воспела еси: * се отныне ублажат Мя вси роди. * И, на ту зрящи, глагола еси со властью: * с сим образом благодать Моя и сила. * И мы истинно веруем, яко се рекла еси, Госпоже: * сим образом с нами еси. * Тем благоговейно предстояще, покланяемся Тебе, раби Твои: * посети ны Твоими Матерними щедротами.

Глас 7: **Г**ора еси великая и преславная, * паче горы Синайския, Богородице. * Она бо, не терпяше снития славы Божия, во образех и сенех, * огнем возгарашеся, * и громи и молнии тамо быша. * Ты Божественный огонь суц, * Божие Слово во чреве Твоем неопально носила еси * и от сосец Твоих млеко питала еси манием Носящаго вся. * И Матернее дерзновение к Нему имущи, * помози, Владычице, верно празднующим Твой честный праздник * и не забуди, милостивно посещающи, * прияла бо еси от Бога дар * строити и покрывати христоименитое стадо, рабы Твоя.

Слава, и ныне, глас 6:

Тебе вси роди человечестии * хвальныя дары приносят, Владычице, * и молятся яко Царице и Матери Божии, * пророцы Тя премудро проповедаша, * левити благословиша, * апостоли и мученицы исповедаша, * вся сословия покланяются, * архиерее проповедают, * монаси и прости благоговоят, * богатии и убозии, сироты и вдовы, * и всяк возраст, и всяко преспеяние, * старческое и младенческое, * под кров Твой державный с верою прибегаем: * покрый и соблюди, Госпоже, молитвами Твоими * и спаси от бед души наша.

На стиховне стихиры, глас 8.

Подобен: Что вас наречем:

Что Тя наречем, Богородице Владычице? * Корень ли Иессеов? * от Тебе бо нам Христос, яко цвет, изыде. * Манну ли верных сердца услаждающую Твоим

Рождеством? * Руно Гедеоново? * На Тя бо Христос, яко роса, сниде * и Тя Заступницу нам показа. * Егоже моли спасти души наша.

Стих: Слыши, Дщи, и виждь, * и приклони ухо Твое.

Да вси похвалим, вернии, * таково нам заступление давшую непостыдное, * и непреборимое на враги одоление победное, * и нам всем спасение, * и граду нашему стелу и покров, * и основание непоколебимое, * и отечеству нашему на сопостаты пособие, * и непобедимую победу.

Стих: Клянется Господь Давиду истинною * и не отвержется ея.

Достойно Тя блажит человеческий род, Чистая, * яко спасаеши чтущия Тя от всех бед. * Ты бо, Госпоже Дево Чистая, * Заступница непостыдная Твоим рабом показала еси * и Молитвенница тепла к Богу * от находящих скорбей. * Тобою варварская шатания разрушаются * и стрелы вражия упражняются, * и, раби Твои, от одержавших бед избавльшися, * Тя, Богомати, песньми ублажаем.

Слава, и ныне, глас тойже. Самогласен:

Да радуются российстии собори, * да ликовствует естество, * яко Твоего, Чистая, честнаго образа пришествием * град наш спасается, * раби Твои, от одержавших нужды избавльшися, * Тебе, Чистая, взывают: * радуйся, добрых виновная, * и Заступнице непостыдная, * и спасение душ наших.

Тропарь, глас 4:

Днесь светло красуется славнейший град Москва, * яко зарю солнечную, восприемши, Владычице, чудотворную Твою икону, * к нейже ныне мы притекающе и молящися Тебе, взываем сице: * о пречудная Владычице Богородице! * Молися из Тебе воплощенному Христу Богу нашему, * да избавит град сей и вся грады и страны христианския невредимы от всех навет вражиих * и спасет души наша, яко Милосерд.

НА УТРЕНИ

На Бог Господь, тропарь, глас 4:

Днесь светло красуется славнейший град Москва, * яко зарю солнечную, восприемши, Владычице, чудотворную Твою икону, * к нейже ныне мы притекающе и молящися Тебе, взываем сице: * о пречудная Владычице Богородице! * Молися из Тебе воплощенному Христу Богу нашему, * да избавит град сей и вся грады и страны христианския невредимы от всех навет вражиих * и спасет души наша, яко Милосерд. [Трижды]

По 1-й стихологии седален, глас 4.

Подобен: Удивися Иосиф:

Божественными зарями просвети поюция Тя и умы утверди, Непорочная Дево, * крепкая Заступнице мира всего. * Темже торжествуем вси, любовию поюще Тя и пришествие Твоего образа славяще: * не престай, Дево, молитвами Твоими спасаючи рабы Твоя от всякия беды, * едина Благословенная.

Слава, и ныне, Богородичен:

Невесто Неискусобрачная, премудрости село показася утроба Твоя Бога Слова: * Ты бо едина, Мати Божия, благих Ходатаица явившися, * всяких страстей избави рабы Твоя, непрестанно воспевающия славу Твою.

По 2-й стихологии седален, глас 3.

Подобен: Красоте девства:

Яко звезда многосветлая, взыде от востока к западу Твой образ, Богомати, * озари скорби тьмою одержимых, и прещения враг избави, * и, вся тех сети разрушив, явися Предстательница крепкая, * оружие непобедимое на враги миру всему: * из Тебе бо всех Владыка плоть примим, вся человеки обожи.

Слава, и ныне, тойже.

По полиелеи припев:

Достойно есть величати Тя, Богородице, * честнейшую Херувим * и славнейшую без сравнения Серафим.

Псалом избранный: Боже, суд Твой царице даждь.

Таже седален, глас 1:

Блаженна еси Ты, Богородице Чистая, * величества Твоя кто воспети может? * Еже чудо страшно и чудо велие содеявши, * Твоими молитвами, Богомати, чтущий Тя град всегда освобождается от всех бед, * тьмы и меча, поганных пленения и всякаго гнева. * Темже мы, зряще честное образа Твоего пришествие, * хвалим, яко Царицу воспевающе, вернии, * словесы Тя, Чистая, блажаще, глаголем: * Богородице Чистая, моли Воплощеннаго из Тебе спастися душам нашим.

Слава, и ныне, тойже.

Степенна, 1-й антифон, 4-го гласа.

Прокимен: Помяну имя Твое * во всяком роде и роде.

Стих: Слыши, Дщи, и виждь, и приклони ухо Твое.

Всякое дыхание:

Евангелие от Луки, зачало 4.

Во дни оны, воставши, Мариам, иде в горняя со тцанием, во град Иудов. И вниде в дом Захариин, и целова Елисавет. И бысть яко услыша Елисавет целование Мариино, възграся младенец во чреве ея, и исполнися Духа Свята Елисавет. И возопи гласом велиим, и рече: благословена Ты в женах, и благословен плод чрева Твоего. И откуда мне сие, да прииде Мати Господа моего ко мне? Се бо, яко бысть глас целования Твоего во ушию моею, възграся младенец radoцями во чреве моем. И блаженна Веровавшая, яко будет совершение глаголаным Ей от Господа. И рече Мариам: величит душа Моя Господа, и возрадовася дух Мой о Бозе Спасе Моем. Яко призре на смирение Рабы Своея, се бо, отныне ублажат Мя вси роди. Яко сотвори Мне величие Сильный, и свято имя Его. Пребысть же Мариамъ с нею яко три месяцы, и возвратися в дом Свой.

По 50-м псалме стихира, глас 2:

Готовися, всечестный граде Москва, * на сретение Девы Богоматере: * се бо грядет к тебе * светлое великое солнце от врат затворенных. * Тьма убо скорби твоя отгоняется, * свет же твоего веселия исполняется, * буря сопротивных ветров уставляется, * мужие и священницы в печалех сладкое утешение приемлют, * Царице единой поклоняются * и, молящися, глаголют: * Пречистая Дево, * мольбами Твоими избави рабы Твоя * от всякия беды и печали.

Канон похвале Богородицы со ирмосом на 6 и праздника, глас 4, на 8.

Песнь 1

Ирмос: Отверзу уста моя, * и наполнятся Духа, * и слово отрыгну Царице Матери, * и явлюся, светло торжествуя, * и воспою, радуяся, Тоя чудеса.

Просвети, Владычице, души наша зарею Божественною, паче ума благодатию Твоею, и независтный дар подаждь ми воспети Тя, яко Помощницу человеческому существу, Препетая, верное заступление, на враги победу отечеству нашему.

Приидите, соберитесь, россиястии собори, в пречестный храм Всенепорочныя Владычицы и возопийте, умильно молящися, к честному образу взирающе: Богородице Безневестная, хвалящая Тя спаси.

Твой, Богомати, всечестный образ Богогласный Евангелия Христова списатель, пребожественный Лука, написав, Творца всех на Твоих честных руках вообрази, к немуже притекающая напасти и печали избавляеши и вся покрываеши Твоею милостию.

Храм прекрасный, Содетель всех едину Тя обрет, в Тя вселися и человеки обожи. К Немуже за ны, Богородице, молися, спасти ны от поганых пленения и всякия иныя скорби, находящая на ны, да Твоего днесь образа сретение всечестно празднуем.

Песнь 3

Ирмос: Твоя песнословцы, Богородице, * Живый и Независтный Источнике, * лик Себе совокупльшия, духовно утверди, * в Божественной Твоей славе * венцев славы сподоби.

Все помышление отвергши, Богомудрии, приидите в сретение прекрасныя зари, держащая пресветлую лучу, вся просвещающую и милостию весь мир обогащую.

Твою, Богомати, всечестную и чудотворную икону россиястии люди стяжавше, яко заступление крепко и стену нерушиму, молятся Ти, на враги победу даровати отечеству нашему.

Облак светозарный показася, росюю благодати вся омывающа телесныя скверны и души просвещающа, едина Всепетая.

Древо многоплодно явилася еси, пищею негиблющею вся насыщающа, души же веселяща, Богоневесто Чистая, добродетельная всем источи и от скорбей, нуждных спаси.

Ин кондак, глас 8.

Подобен: Взбранной:

К Взбранней Воеводе и Заступнице, Деве и Богородице, * в чистой совести, верую утвердившаяся, руссии народи, * невозвратно надежду имуща, притецем, * к чудотворному Ея и пречистому образу, и возопием Ей: * радуйся, Невесто Невестная.

Седален, глас 4.

Народи боголюбивии, приидите в сретение: * се бо приходит Дева, всех пророков превышши, * честным Своим образом, Жизнодателя миру на руках имеюща, * град Свой сохранять страждущий, варварскую дерзость низложити, * вообразитися всем Хранительница тверда, * держава и ограждение верно молящимся.

Слава, и ныне, тойже.

Песнь 4

Ирмос: Неизследный Божий совет, * еже от Девы воплощения * Тебе, Вышняго, * пророк Аввакум усмотря, зовяще; * слава силе Твоей, Господи.

Гору превелию, юже Даниил виде, от неяже камень отсечеся без руки и вся соблазны истины, верныя же просвети, истинное светозарное солнце показа, лучами просвещающа, Богородице Приснодево.

Вооружаются на люди Твоя, Чистая Богородице, сынове Агарины, злый совет творяще, грады разоряюще, верныя же погубляюще, но Ты, Всепетая, Твоею милостию вся низложи, исмаильтяны враги покаряюща отечеству нашему.

Небо одушевлено, едина Богомати, Свет велий приемши, вся просвещающа, тьму держащих бед разжени и нас Вышняго причастия сподоби.

Давид пред кивотом ликовствует, левити же воспевают, паче же пред Тобою, Богородительнице Чистая, Россия хвалами яко Царицу воспевают, гласы молебными прилежно Ти вопиюща: радуйся, Заступнице града нашего.

Песнь 5

Ирмос: Ужасошася всяческая * о Божественной славе Твоей: * Ты бо, Неискусобрачная Дево, * имела еси во утробе над всеми Бога * и родила еси Безлетнаго Сына, * всем воспевающим Тя * мир подавающая.

Тебе, Богомати, великий во пророцех Исаия провиде Духом, Угль имеюща во чреве, верныя просвещающа и соблазны вся пожигающа, спасая род человек.

Жезл Ааронов прозябла еси и злобный корень исторгнула еси, Дево Богоневестная, Жизнодателя рождаши миру, Егоже моли сему граду спастися от многих напастей.

Ныне убо приступите с веселием, Богоизбранное стадо, россиястии собори, ко Всечестней Божии Матери и честный Ея образ любезно примите: се бо благодать

неисчерпаемая, воды точащи Божественныя неоскудно, Юже, вернии, почтим и честному образу Ея поклонимся.

От корене Иессеева древо возрасте всем животное, Плод убо прозябла еси во утробе Твоей, Дево Чистая, вся люди насыщающи Твоею милостию.

Песнь 6

Ирмос: Божественное сие и всечестное * совершающе празднество, * Богомудрии, Богоматере, * приидите, руками воспещим, * от Нея рождашагося Бога славим.

От Тебе, Богомати, истече поток сладкий, вся напаяя люди, душ измывая скверны, Богородице Владычице, спаси всех, поклоняющихся верно честному образу Твоему.

Вси убо, совокупльшися вкупе, воспоем Чистую Деву, Богоизбранную лествицу Иаковлю, Гедеоново же руно, радости Ходатаицу, крепость и похвалу спасаемых, Богородительницу Чистую.

Се ныне веселие приближается, скорбь же потребляется, вернии спасаются, яко от источника радость почерпающе, выну хвалами воспевают: радуйся, Чистая Владычице, спасения нашего начаток и всех верных стена и похвала.

Подаждь нам помощь мольбами Твоими, Пречистая Богородице, скорби убо находят на ны и печали умножаются, врази ополчаются, но Ты, Пречистая, представши, избави, врагов наших шатание низложи, на враги победу даруй, да посрамятся вси, являющии рабом Твоим злая.

Кондак, глас 8.

Подобен: Взбранной:

Взбранной Воеводе победительная, * яко избавльшися от злых пришествием Твоего честнаго образа, * Владычице Богородице, * светло сотворяем празднество сретения Твоего * и обычно зовем Ти: * радуйся, Невесто Невестная.

Икос: Ангел предстатель с Небесе послан бысть рещи Богородице: радуйся, и, со безплотным гласом воплощаема Тя зря, Господи, ужасашеся, и стояше, зовый к Ней таковая: радуйся, Еюже радость возсияет; радуйся, Еюже клятва исчезнет. Радуйся, падшаго Адама воззвание; радуйся, слез Евиных избавление. Радуйся, высоту неудобовосходимая человеческими помыслы; радуйся, глубино неудобозримая и ангельскими очима. Радуйся, яко еси Царево седалище; радуйся, яко носиши Носящаго вся. Радуйся, звезда, являющая солнце; радуйся, утробо Божественнаго воплощения. Радуйся, Еюже обновляется тварь; радуйся, Еюже поклоняемся Творцу. Радуйся, Невесто Невестная.

Песнь 7

Ирмос: Не послужиша твари Богомудрии * паче Создавшаго, * но, огненное прещение мужески поправше, * радовахуся, поюще: * препетый отец Господь и Бог, благословен еси.

Яко порфирною и виссом, червленою хламидою, Дево Богородице Владычице, град Твой, Тобою одеяся, Христа величает и пришествие честнаго Твоего образа славит, явльшася паче луч солнечных и немрачным светом просвещающа велегласно хвалящия Тя.

Скрижали, богописанныя перстом Духа, в ярости Моисей сокруши; но в Тебе, Чистая, преславный Творец вселился, невредну Тя сохрани. Емуже поем: отец наших Боже, благословен еси.

Приими Твоих раб мольбы, Пречистая Дево Богородице, непостоянную бурю утиши молитвами Твоими и советы противных врагов разжени, нападающих на стадо Твое, Всенепорочная Владычице.

Тебе едину помощницу роду человеческому, Богородице Марие, Зиждитель всех рождением Своим назнамена и пророцы прообразиша: ов Тя дверь, ин же Тя ложницу Божию; мы же Тя воспеваем Родительницу Божию, и Ходатаицу к Богу, и Заступницу от всех зол, находящихся на ны.

Песнь 8

Ирмос: **Отроки благочестивыя в пещи * Рождество Богородичо спасло есть, * тогда убо образуемое, * ныне же действующее, * вселенную всю воздвизает пети Тебе: * Господа пойте, дела, * и превозносите Его во вся веки.**

Како Тя, Дево, по достоянию воспоем? Помощь твердую, Хранительницу жизни наша и Ходатаицу непреложну к Сыну Твоему и Богу нашему, Егоже воспеваем и превозносим во веки.

Цвете прекрасный и воня пищная, облагоухаеши, Богородице Марие, вся, и спасаеши, и от недуг исцеляеши, бесы прогоняеши. Темже Ти вопием: радуйся, Помощнице всем молящимся верным.

Столп явльшися, Богомати, нахождения противных отгоня: Тя бо чтущим сердцем теплым явилася еси стена, и ограждение, и спасительное прибежище.

Давидски воспеваем Ти песнь, гору Божию Тя именующе, Пречистая Дево: Источника бо сущим приснотекущаго источила еси. Егоже поем и превозносим во веки.

Песнь 9

Ирмос: **Всяк земнородный * да възграется, Духом просвещаемь, * да торжествует же Безплотных умов естество, * почитающее священное торжество Богоматере, * и да вопиет: * радуйся, Всеблаженная Богородице, * Чистая Приснодево.**

Радости Ходатаице, возвесели наш смысл вопити Тебе, Богородице Чистая: радуйся, Хранительнице наша, державо, и ограждение, и спасительное прибежище.

Да восхвалят согласно Тя небо и земля, яко Жизнодателя миру рождши: радуйся, тихое пристанище, животныя воды источиче неисчерпаемый, Владычице.

Собравшеса днесь, людие, во сретение Пречистыя Божия Матере, Яже винограда мысленнаго грезн носящи, вино источающ всегда и веселия всех исполняющ, яко Богородицу по долгу славим.

Божественная река вод животных, вся удолия напояющи, наша соблазны, Богомати, погрузи и до конца потреби.

Светилен.

Подобен: **Посетил ны:**

Да почитися днесь Богомати, Зиждителя рождающая, * райских дверей отвержение и всего мира очищение, * победу давшая христоролюбивому воинству, * о Сей бо пророцы глаголаша, Той поклонимся.

Слава, и ныне:

Пресветлая днесь милостивная светлость, * Божия благодать, вся радостно одождает небесными тучами, * на стези сладкия направляющи, Богородице Владычице, всех, * познавших Тя земных, Приснодево, * ныне бо вся земля Российская радуется, верую Тя славящи.

На хвалитех стихиры на 4, глас 4.

Подобен: Яко добля:

Наставницу Тя заблуждим * и пристанище спасительное * в пучине, Владычице, и в бури, * и во искушениях, и в печалех * Христос Тя всем показа, * Сын Твой и Бог наш, * верно приходящим к Тебе. * Егоже моли от злых бед избавитися * ведущим Богородицу Тя воистинну. [Дважды.]

Тление потребила еси * и болезнь, Всепетая, древнюю всю Рождеством Твоим: * Живот бо миру рождаши * и смерть разрушивши, * болезни, Благая, исцеляеши * верно образа Твоего чудеса воспевающих, * и любовию кланяющихся, * и чтущих Тя, Святую и честнейшую Наставницу.

Яко источник Тя, Препетая, * живота и благодати, источающий чудеса * и цельбу страстей душевных и телесных, * яко быстрину оставления, * милости щедрот неисчерпаемое море видяще, * Тебе припадаем, вси, оскорбляемии ныне, * просяще вси разрешения будущаго мучения.

Слава, и ныне, глас 8:

Иже на Херувимех ездая * и певаемый от Серафим, * спел еси с Небесе пророчески, Блаже, * и вселился еси во утробу Чистыя Богоотроковицы, * Юже Ангели воспеша тайно: * радуйся, радостная Дево, * необъятнаго яко Бога во чреве Твоем приемши паче слова, * от неверия в веру мир преводяща; * слава Тебе, Христе, едине Милостиве и Человеколюбче.

Славословие великое. И отпуст.

НА ЛИТУРГИИ

Блаженны, от канона песни 3-я и 6-я.

Все помышление отвергну, Богомудрии, приидите в сретение прекрасныя зари, держащая пресветлую лучу, вся просвещающую и милостию весь мир обогащающую.

Твою, Богомати, всечестную и чудотворную икону российстии люди стяжавше, яко заступление крепко и стену нерушиму, молятся Ти, на враги победу даровати отечеству нашему.

Облак светозарный показася, рососою благодати вся омывающи телесныя скверны и души просвещающи, едина Всепетая.

Древо многоплодно явилася еси, пищею негиблющею вся насыщающи, души же веселящи, Богоневесто Чистая, добродейния всем источи и от скорбей, нуждных спаси.

От Тебе, Богомати, истече поток сладкий, вся напаяя люди, душ измывая скверны, Богородице Владычице, спаси всех, поклоняющихся верно честному образу Твоему.

Вси убо, совокупльшеся вкупе, воспоем Чистую Деву, Богоизбранную лествицу Иаковлю, Гедеоново же руно, радости Ходатаицу, крепость и похвалу спасаемых, Богородительницу Чистую.

Слава: **С**е ныне веселие приближается, скорбь же потребляется, вернии спасаются, яко от источника радость почерпающе, выну хвалами воспевают: радуйся, Чистая Владычице, спасения нашего начаток и всех верных стена и похвала.

И ныне: **П**одаждь нам помощь мольбами Твоими, Пречистая Богородице, скорби убо находят на ны и печали умножаются, врази ополчаются, но Ты, Пречистая, представши, избави, врагов наших шатание низложи, на враги победу даруй, да посрамятся вси, являющии рабом Твоим злая.

Тропарь, глас 4:

Днесь светло красуется славнейший град Москва, * яко зарю солнечную, восприемши, Владычице, чудотворную Твою икону, * к нейже ныне мы притекающе и молящеся Тебе, взываем сице: * о пречудная Владычице Богородице! * Молися из Тебе воплощенному Христу Богу нашему, * да избавит град сей и вся грады и страны христианския невредимы от всех навет вражиих * и спасет души наша, яко Милосерд.

Кондак, глас 8.

Взбранной Воеводе победительная, * яко избавльшеся от злых пришествием Твоего честнаго образа, * Владычице Богородице, * светло сотворяем празднество сретения Твоего * и обычно зовем Ти: * радуйся, Невесто Неневестная.

Прокимен, глас 3, песнь Богородицы:

Прокимен: Величит душа Моя Господа, * и возрадовася дух Мой о Бозе Спасе Моем.

Стих: Яко призре на смирение рабы Своя, се бо отныне ублажат Мя вси роди.

Апостол ко евреем, зачало 240.

Братие, сие да мудрствуется в вас, еже и во Христе Иисусе, Иже во образе Божии сый, не восхищением непщева быти равен Богу. Но Себе умалил, зрак раба приим, в подобии человечестем быв, и образом обретесе якоже человек. Смирил Себе, послушлив быв даже до смерти, смерти же крестныя. Темже и Бог Его превознесе и дарова Ему имя, еже паче всякаго имени, да о имени Иисусове всяко колено поклонится небесных и земных и преисподних, и всяк язык исповестъ, яко Господь Иисус Христос в славу Бога Отца.

Аллилуиа, глас 8: Слыши, Дщи, и виждь, и приклони ухо Твое.

Стих: Лицу Твоему помолятся богатии людстии.

Евангелие Луки, зачало 54.

Во время оно, вниде Иисус в весь некую, жена же некая именем Марфа прият Его в дом свой. И сестра ей бе нарицаемая Мария, яже и седши при ногу Иисусову, слышаше слово Его. Марфа же молвяше о мнозе службе, ставши же рече: Господи, не брежеш ли, яко сестра моя едину мя остави служити; рцы убо ей, да ми поможет. Отвещав же Иисус, рече ей: Марфо, Марфо, печешися и молвиши о мнозе. Едино же есть на потребу. Мария же благую часть избра, яже не отыметя от нея. Бысть же егда глаголаше сия, воздвигши некая жена глас от народа, рече Ему: блажено чрево носившее Тя, и сосца, яже еси ссал. Он же рече: темже убо блажени слышавшии слово Божие, и хранящии е.

Причастен: Чашу спасения прииму, и имя Господне призову.